

في بلاد الركنة ب2000 جنيه وعرض أزياء الكلاب في الساحل الشمالي عنوان شعب وشعب



السبت 10 أغسطس 2024 04:10 م

يتناول كثير من المراقبين اسم الساحل الشمالي اجتماعيا بمعنى التمييز أو التصنيف والعقد النفسية والطبقية وغيرها من التعبيرات والمصطلحات الدالة على أزمة في منطقة سياحية حولته من مصيف للاستجمام والراحة النفسية إلى مكان للتنافس على الأكبر والأطول والأغنى والأكثر إنفاقاً

أما أحدث أفكار مدينة العلمين فكان أول عرض أزياء للكلاب في مصر ضمن مهرجان العلمين الجديدة الذي حضر افتتاحه السيسي ومحمد بن زايد

ومن الكواشف، عن ذلك ما يكتبه ناشطون عن مالديف مصر في مرسى مطروح وهي إحدى مناطق الساحل الشمالي، عبير عربان عبر "فيسبوك"، "Abeer Orban تقول: "انا بقيت أكره الساحل الشمالى .. اللى اتحول من جنة فى مصر ومن مجرد مصيف ومكان ساحر وخلياب لمجموعة شركات للتصنيفات الإنسانية .. بأكرهه بتصنيفاته شريير وطيب وغنى وفقير بأكرهه بعقده النفسيه وتشوهاتة الإجتماعية ..".

الإنفاق بغرض التعالي
وتضيف أن القدرة على إنفاق الأموال ليس هدفاً بحد ذاته وإنما الإنفاق يكون بغرض التعالي، "الفكرة مش فى القدرة على الصرف ومجاراة ناس معها فلوس .. الواحد الحمد لله يقدر يصرف ويروح ويبقى .. وياما روح اماكن كويسه جوا مصر وبراهها واستمتعت جدا والحمد لله .. بس عمرى ما صرفت قرش فى غير محله وبالشكل المستفز ده .. يعنى انك تصرف فلوس اكثر عشان تحاول تثبت مستواك أو تعلى على حد بالمصاريف عشان تبان احسن منه .. ده اسمه عبث وسفه ..".

وعن مثال ذلك البحث عن مكان لصف السيارات ثم يكون الثمن ألفي جنيه "يعنى ايه تدخل مكان تدفع فيه باركينج 2000 جنيه وما تقدرش تفتح بوقك عشان ما يبانك انك من طبقه ياي ازاى بيتكلم فى ركنه ب2000 جنيه .. انت مجنون يا ابنى ..؟.. انت كده مش بتثبت نضافتك ولا مستواك .. انت بتثبت نقصك وسفهك .. ولو فى عيلتك حد عاقل المفروض يرفع عليك قضية حجر .. انت ناقص الأهلية بكل المقاييس ..".

اختبار كم في جيبيك؟!

أما ثاني الاعتبارات الاجتماعية هي نظرة الآخرين لما يمكن أن يكون بجيبك، تعبر عنه كالتالي: "يعنى ايه تدخل أى مكان فى الدنيا تلاقى كل اللى شافوك من اول فرد الأمن لآخر واحد على البحر يببصلك ويجيبك من فوقك لتحتك فى اختبار حيوانى عبيط لدرجتك الاجتماعية ومدى كونك نظيف ولا نظيف اوى ولا نظيف اوى برو ولا متستحقش تبقى موجود فى الحياة .. لابس من مجرد زارا عادى زيك يا عادى ولا لابس ماركات من اللى بتعدى مجرد ألوفات بسيطة يا فقير اوى".

ومن بين ذلك النظرة للإطار أو للخارج .. "الساعة اللى انت لابسها أبل ولا صينى يا معفن .. عربيتك مجرد قشقاى ولا توسان يا فلاح ولا تدخل معنا فى سباق ولاد الذوات بعربيات باتمان اللى معنا .. قمة النقص والإحساس بالدونية ..".

تثبيت نظرة خاطئة

تقول عبير إن "المشكلة الأكبر مش فى اللى فات .. المشكلة الأكبر أن فى ناس فاكهه أن اللى هي بتشوفه ده هو الثابت والصح وإن هو اللى عدمان ووحش .. الطبقات تاهت وسط بعضها بتمثيل .. المتوسط نفسه يبقى غنى والغنى نفسه يبقى أغنى والأغنى بيعلى على اللى تحته ومتنرفز من اللى فوقه ..".

وعن انعكاس هذه النظرة الخاطئة تكشف طبيعة من يكون كذلك "تلاقى بنت انت عارف انها غالبا من مدينة عادية و أهلها متوسطين وحالتهم حال الأغلبه حال عادى يعنى ..عشان توصل الطبقة اللى نفسها تخالطها وتعيش عيشتها بتبدأ تتنازل فى لبسها وشربها وكلامها .. ترقص تشرب مخدرات .. تلبس مش مجرد بكينى ..لا بكينى من اللى الأجانب فى شرم وغردقه وبرأ اصلا ما يلبسهوش .. دى مش مواصفات البنت النظيفة يا غبية .. دى مواصفات لا مؤاخذة البنت الشمال .. ولا الطبقة اللى انتى بتتلزقى فيها هتشوفك غير كده على فكرة ..".

عن المقابل النوعي بالنسبة للذكور "الواد من دول بيعمل المستحيل عشان يدخل حفله من إياهم من اللي كله بيتعمله انترفيو رخيص عشان يدخلها واللى هما بيبقوا لابسين أبيض فى أبيض دول وتلاقية متداين وعليه فلوس ومستلف وفى الغالب دافع للمزة اللي جاييها معاه من قلب المدن الطيبه ومقلعها عشان بس يدخل يشرب ويقلع ويثبت لنفسه أنه جامد .. و لو فكر في الجواز لا يمكن تكوني إنتي اللي روحتي معاه".

الرضا بالواقع

وتقدم عيبر عربان في خاتمة منشورها نصائح أبرزها احترام حقيقة السخرية في الكون وأن الاحترام ليس له علاقة بما تنفقه فتقول: "ارحموا نفسكوا يا جماعه وتأقلموا مع الحقيقة الكونية إن ربنا خلق الناس طبقات مش طبقة واحدة وأنه سبحانه أقر بكده فى القرآن الكريم .. مش لازم خالص عشان اتبسط ابقى شبه حد تانى أو معايا اللي معاه .. مش هبقى ناقص أو متخلف لو عيشت عيشة أهلى وعلى قد اللي معايا فى مكان بيحترم الناس وفلوسها .. مش مكان بيعلى عليك وشايفك مجرد فيزا وما يهموش غير أنه يقلبك مش مهم انت جايب الفلوس ازاي .."

ومن أبرز ما تنصح "اتقوا الله فى عيالكم ونفسكم وفلوسكم ..".

وتشير إلى أن "..دى مش دعوه خالص انك تحرم نفسك من حاجه او تعيش تعيش .. بالعكس حوش وسافر يمين وشمال واتبسط فى احلى اماكن بس بدون عقد نفسيه وبدون نظرات طبقية منك او ليك للناس اللي حواليك .. سيب اللي معاه فلوس يعمل اللي هو شايفه بطريقته بس من غير ما يصنفك أو يقلل منك واعمل كمان اللي انت عاوزه من غير ما تبص لحد أقل منك بطريقة تزعله وتقلل منه ولا تبص لى فوقك أنه حلم نفسك توصله .. انت اصلا مش محتاج تثبت لحد حاجه عنك .. لأن اللي بيميزك عنه إنك إنت .. إنت .. و إنك مش هو ..".

وعبر هاشتاغ #مطروح_مطروح بعد أن باتت كما وصفت تضيف، "..سافروا وانبسطوا على قد اللي معاكم .. سافروا لأماكن تقدر انك جاي تنبسط فيها وبتساعدك بكل الطرق انك تكون ميسوط .. سافروا فى أماكن ناسها متربيه ومعندهم مش عقد اجتماعيه ونفسيه أيا كانت طبقتهم .. وساعتها هتلاقى نفسك وسطهم مهما كنت ومهما كانوا .. وإلى أن يصبح الساحل الشمالى أحد تلك الأماكن المصريه الجميله للإنبساط والمتعه دون التصنيف سيظل كرهى له ممتدا ..".